

23 APR 2001

RMK8-PENDAHULUAN

RMK8 TEKANKAN SUMBER MANUSIA UNTUK SOKONG K-EKONOMI, KATA PM

KUALA LUMPUR, 23 April (Bernama) -- Perdana Menteri Datuk Seri Dr Mahathir Mohamad berkata Rancangan Malaysia Kelapan (RMK8) akan menekankan penyediaan asas sumber manusia yang kukuh untuk menyokong pembangunan ekonomi berasaskan pengetahuan serta merpertingkatkan produktiviti dan daya saing.

Beliau berkata dalam tempoh RMK8, Malaysia akan menghadapi cabaran yang lebih besar daripada globalisasi dan liberalisasi serta pembangunan teknologi maklumat dan komunikasi yang pesat.

"Kita perlu merpertingkatkan daya saing dan memperkukuhkan daya tahan ekonomi serta mempercepatkan pembangunan ekonomi berasaskan ekonomi," kata Dr Mahathir di dalam kata pendahuluan RMK8 yang dikeluarkan oleh Unit Perancangan Ekonomi (EPU), di Jabatan Perdana Menteri.

Bagi mencapai tujuan ini, perdana menteri berkata, negara perlu mengubah strategi pembangunan daripada pertumbuhan yang didorong oleh input kepada pertumbuhan pertumbuhan yang didorong oleh pengetahuan.

Tumpuan akan diberi untuk memperkemas teknik pengurusan dan organisasi, merpertingkatkan keupayaan dalam penyelidikan dan pembangunan dan organisasi, merpertingkatkan keupayaan dalam penyelidikan dan pembangunan dan sains dan teknologi serta memperkukuhkan keupayaan inovatif, tambahnya.

Dr Mahathir berkata usaha-usaha ini akan meningkatkan pertumbuhan potensi keluaran dan mempercepatkan perubahan struktur dalam sektor pertanian, pembuatan dan perkhidmatan.

"Kita juga perlu merpertingkatkan nilai ditambah bagi semua aktiviti produktif melalui penggunaan pengetahuan dan juga mewujudkan industri baru yang berintensif pengetahuan," tambah beliau.

Perdana Menteri berkata usaha akan diambil untuk membangunkan satu sistem pendidikan dan latihan yang cekap dan responsif bagi memenuhi keperluan tenaga buruh yang berpengetahuan dan berkemahiran tinggi serta dilengkapi dengan nilai-nilai positif.

Dr Mahathir juga menyeru rakyat Malaysia agar tidak seharusnya berpuashati dengan pencapaian yang dinikmati hasil kemajuan ketara sepanjang tempoh lima tahun yang lalu.

Beliau berkata Malaysia perlu bertindak balas kepada perubahan corak perdagangan dan pelaburan yang timbul daripada peningkatan persaingan dalam ekonomi antarabangsa.

Beliau berkata rakyat perlu membina pemikiran dan sistem nilai yang positif dan sesuai bagi membangunkan budaya produktiviti dan kecemerlangan serta memastikan kejayaan dapat dikekalkan.

"Kita perlu berkerja keras untuk menghadapi cabaran dalam membentuk masyarakat yang matang, liberal dan toleran yang mana semua rakyat bebas mengamalkan adat, budaya dan kepercayaan agama masing-masing.

"Hanya melalui cara ini sahaja, kita dapat membina negara Malaysia yang bersatu padu, mempunyai perasaan dan semangat berkongsi matlamat bersama, keamanan dan kemakmuran, perpaduan di kalangan pelbagai etnik, hidup dalam harmoni serta ikatan perkongsian yang saksama," kata Perdana Menteri.

Dr Mahathir berkata apabila negara kita bertambah maju, keutuhan struktur keluarga dan masyarakat serta usaha ke arah mencapai integrasi sosial akan diuji.

Tegasnya adalah perlu untuk memastikan masyarakat dapat terus mengekalkan daya tahan, mampu menghadapi apa jua pengaruh negatif yang

mungkin menjejaskan toleransi dan keharmonian.

"Dalam usaha kita membentuk sebuah negara yang berdaya tahan, kita hendaklah terus memupuk dan memelihara semangat kejiranan dan kehidupan yang harmoni di kalangan pelbagai masyarakat dengan mengukuhkan perpaduan, menanam semangat patriotik, membentuk masyarakat lebih toleran dan penyayang serta meningkatkan kualiti hidup rakyat," katanya.

Kerajaan akan memastikan segenap lapisan masyarakat terutamanya masyarakat luar bandar menikmati dan mendapat faedah daripada peluang yang disediakan termasuk pendidikan, pekerjaan dan perkhidmatan sosial.

Pelbagai usaha akan diambil untuk memastikan kemudahan sosial disediakan dengan lebih meluas dan berkualiti termasuk suasana kerja, tahap kesihatan dan alam sekitar yang lebih baik, jelasnya.

Perdana Menteri berkata strategi membangunkan sebuah masyarakat yang saksama akan diteruskan untuk memastikan kestabilan sosial dan politik serta pencapaian matlamat perpaduan negara.

Program pembasmian kemiskinan akan memberi penekanan yang khusus ke arah mengatasi kelompok kecil miskin di kawasan bandar dan luar bandar.

Beliau berkata strategi pengagihan akan memberi tumpuan untuk mengurangkan ketidakseimbangan ekonomi antara kumpulan etnik dan meningkatkan pemilikan ekuiti korporat bumiputera.

Walaupun bagaimanapun, kejayaan usaha ini terletak pada bumiputera sendiri untuk membangunkan nilai, kemahiran dan keupayaan yang diperlukan bagi membolehkan mereka mengambil kesempatan daripada peluang yang tersedia dan muncul sebagai usahawan yang berjaya, tegasnya pula. -- BERNAMA

LES OS